

# Rebecca soim kala long wok

James Kila i raitim

**WANPELA** yangpela meri husat i wok fainol yia bilong en long Agrikalsa Sains long Yunivesiti ov Teknoloji long Lae i opim stret ai bilong ol supavaisa bilong em wantaim gutpela wok em i kamapim.

Nem bilong dispela yangpela meri em Rebecca Amira na em hapkas bilong Ukarumpa long Isten Hailans provins na Enga.

Rebecca em i wanpela meri bilong wok stret na planti taim em bai karim savol na putim bikipela gambut na wokabaut na lukluk long ol flaua na ol nara-pela ol samta na ol i stap wok klostu wantaim.

Em i tokim Wantok Niuspepa olsem em i amamas tru long mekim prektikol wok ekspirien bilong em wantaim Hailans Kainantu Limited (HKL) long Kumian kem we i save lukautim Kainantu gol main long Isten Hailans provins.

Planti ol lain husat i stap long Kumian kem em ol lain wokman bilong HKL etministresen em ol wokman bilong Nesenwaid Ketaring Sevis na ol wokman bilong plent sait na ol maina.

Long sotpela taim Rebecca i wokim prektikol bilong en, em i winim tru lewa bilong bodsman o supavaisa



**GUTPELA WOK BILONG EM:** Yunitek lukluk Rebecca Amira i wok long liklik grinhaus long Kumian em HKL i stap long en.

bilong em. Dispela man em Envairomen Menesa bilong HKL, Billy Sari.

"Dispela meri em wanpela strongpela meri tru mi lukim. Em i no save malolo long mekim wok. Sampela taim em i save stat wok long bikipela moning tru na mi save laikim kain wok bilong em," Mista Sari i tok.

Tru tumas HLK i mekim gutpela wok tru long lukautim bus, wara na graun long dispela eria ol i wok long painim gol long en long Bilimoia. Ol dispela wok em i mekim i soim olsem em i gat gutpela tingting long lukautim wok em i laik kamapim na ol pipel bai i ken

amamas long bihain taim.

Mista Sari wantaim helpis bilong ol wokman bilong em i bin planim ol kain kain nupela gras na tu ol diwai long givim gutpela gris long graun na tu long mekim dispela ples i kamap gut long bihain taim gol main operesen bai pinis.

Na gutpela ekspirien tru em Rebecca i kisim long wok klostu wantaim Mista Sari, husat em wanpela gutpela bos bilong em na saveman bilong lukautim gut bus, wara na graun.

Tude planti ol yuni-vesti na koles i wok long kamap insait long PNG. Planti ol yang-

pela tu i wok long pinis long ol dispela skul na i wok ol painim wok i stap. Tasol bikipela samting em ol dispela lain i mas soim kala o gutpela wok bilong ol long kirapim bel bilong husat ol dispela kampani long kisim ol. Olsem na long taim bilong wokim ol prektikol, em i gutpela long ol sumatin i wok hat na soim gutpela wok bilong ol long ai bilong ol dispela lain husat i bosim ol.

Tru tumas dispela yangpela meri, Rebecca i soim olsem em wanpela stail meri long wok long bus, wara na graun em envairomen bilong PNG.